

**LUDOUICI REGII  
CONSTANTINI  
SELECTIONES  
ALIQUOT EPISTOLAE**

---

Louis Le Roy

7

2

PRIVILEGII SENTENTIA.

CAVTVM est auctoritate Henrici II. Francorum Regis, ne quis alius  
præter Federicum Morellum, hæcæ Ludouici Regij Epistolæ, ante sexennium  
ab hac prima editione excudat, ne ue uendat. Qui secus fecerit, libris, & pena in  
sanctione æstimata mulcabitur. Privilegium Parisiis interrogatum ac configura-  
tum, die Aprilis decimo, Anno M. D. LIX. Subscriptum de  
consilij sententia,

DELVC.



EDOARDO. VI. ANGLORVM

REGI, LVDOVICVS

REGIVS S. D.

**E**tsi Britannia gentium nulli postferenda est, siue ubertatem soli, & commoditatem maris, & cæli temperiem spectemus. siue fortitudinem hominum & præstantiam artium quibus referta est, siue nobilitatem & antiquitatem regnorum, quibus decoratur: tamen ex tot eius laudibus nulla est aut amplior aut illustrior, quàm quòd te regem hodie nacta est, cum probitate & pietate maximè insignem, tum uerò supra ætatem, supra consuetudinem aliorum huius memorie principum, omni politiore humanitate, & linguarum uariarum cognitione præditum. Accupiueram quidem antea sapius huc uenire, ut situm insula, ac genus hominum nosssem, & quibus uteretur institutis: sed mihi usque ad hanc diem impedimento fuerunt cum occupationes priuata, tum bella quæ inter utramque gentem diuturna fuerunt. Nuper autem fœdere inter te & Henricum regem icto, post Bononiam receptam, cum Procere nostri qui confirmanda pacis gratia huc uenerât,

A ij

multa de tua indole uerè regia prædicarent: hoc magis incensus sum, non cupiditate solùm lustranda regionis, sed etiam admirabili fama incredibilium uirtutum tuarum. Ac demùm huc profectus, & ad te deductus, omnia quæ tribuerentur, tuo merito maiora, quàm aliorum prædicatione, facillè perspexi. Quæ ego pluribus uerbis efferrem, nisi exploratum haberem te esse ea bonitate naturæ, ut eiusmodi laudes non aucuperis: atque ita à doctissimis præceptoribus institutum, ut hæc tantas corporis atq; animi dotes, quæ in te iam mirificè elucent, Deo, cuius est uera & solida gloria, feras acceptas. Caterùm si parum cumulatè gratias agere tuæ maiestati uidear pro præstanti munere quo me donasti, quæso ne mea potius natura, quàm magnitudini eius beneficij tribuas. Quam tamen debeo grati animi sedulitatem, perpetuò præstabo, & qualibuscunque scriptis meis accepti beneficij memoriam testabor. Vale. Londini, X. Cal. Febr. M. D. L I.

CAROLO LOTHARINGO PRIN-  
CIPIS ET CARDINALI LYDO-  
VICVS REGIVS S. D.

**V**ereor ne qui me modò uiderint ad am-  
plitudinem tuã meis officiis colendam  
uenire, arbitrentur secutum magis hæc  
præpotentem florentemque gratiam,  
quàm eximiam tuam singularemque  
uirtutem. Solent enim homines, qui suis commodis non  
honestate amicitias metiuntur, illis potissimum inferuire,  
à quibus expeditam fore uident remunerationem, atque  
eorum gratiam cupidissimè aucupari, quos Regibus esse  
charissimos, aut in rep. primas tenere cernunt: ut ex  
eorum auctoritate præsidia periculis, & honoribus ad-  
iumenta querat. Ego uerò tamen si intelligo te apud Rē-  
gem gratia & auctoritate plurimum ualere, tuãq; opus  
indigeo maximè, nunquam tamē adduci potui, ut plu-  
rū gratiam, opes, dignitatem, nobilitatēq; tuam asti-  
marem, quàm ingenium, eruditionem, & ad res geren-  
das innatam uirtutem. Videre licet alios quibus eadem  
à natura fortunāque adiumenta contigerunt, ea ipsa nō  
ad communem utilitatem (ut par erat) conferre, sed to-  
tos sese libidinibus dedere, uirtutes omnes aspernari, fa-  
stidire remp. per luxū atque ignauia atate agere, dede-  
corantes præstantiā generis & dignitatis. Tu uerò cū  
à puero persuasum haberes, optimū quemq; patriæ na-  
tū, uirtutem primā aut solam expetendā, nihil hominem  
nisi quod honestū decorūq; sit, uel admirari, uel optare

# LVDOVICI REGII

oportere, te ad remp. & ad res magnas gerendas accommodasti, & laboriosam vitam tibi quidem ipsi non necessariam, sed certè hominum generi fructuosam, ociosa quietaq; prætulisti. Itaque effecisti ut magnum in te positum nostræ ætati ornamentum, afflictisque optimis artibus certissimum præsidium sperent omnes. Ac sanè doleo non licuisse adhuc declarare quantum meum studiū extaret uel colenda tua uirtutis, uel obseruanda dignitatis. Sed pudor meus, grauissimaq; occupationes tuæ hanc officij cessationem ac potius tarditatem attulerūt, quam tamen posthac omni diligentia atque assiduitate erga te sarcire conabor. Nuper autem cū conuertissem è Græco sermone in Francicum Institutionem Cyri ex Xenophonte, & duos Isocratis libellos, quorum unus est de regno, alter de principis ac populi officio in rep. coniungendo, eosque Regi (quoniam initio principatus mirifice congruere uidebantur) offerendos putarē, te unum ex omnibus eius intimis ac familiaribus potissimū delegi, cuius uerbis munus illud meū ornari ac tanto principi commendari maximè uellem. Satis constat inter omnēs nihil extare in hoc genere scripti, quod sit cum his libris uel uerborum elegantia, uel sententiarum pondere, uel utilitatis ubertate comparandum. Quos ego an uerbis ad consuetudinem nostram aptis rectè expresserim, tute mihi iudex esse optimus poteris. Et quoniam multum est positum in amicis ac familiaribus Regum, ut hæc & similia munera æquioribus uel iniquioribus animis ab illis accipiantur, a te maximopere peto & quasô

quæso, ut ex tanto dignitatis honorisque fastigio auram aliquam commendationis nouo clienti uelut afflare. Videmus stirpes quæ natura caducae sunt, easdem ut se erigant, clauiculis suis quicquid nascuntur amplecti, cæteraque omnia, quæ per se firmitatis habent minimum, semper ad aliquid, tanquam adminiculum, adniti. Quominus reprehendendi sunt homines tenues, & quicunque minimum habent uirium, si ad claros & potentes uiros se conferant, quorum præsidio nitantur, ut quod per se minus ualent, id ab illis accipiant. Quod si gloriosissimum semper fuit tui ordinis hominibus tueri atque ornare illos in quibus spes aliqua ingenij eluceret, noli obsecro dubitare, Princeps illustrissime atque antistes optime, similem illi gloriæ laudem quam sepiissime querere: eoque magis, cum is sis qui omnes alios quibus nobilitate aut honore par es, uirtute & scientia uincas. Vale. Remis, mense Iulio, M. D. XLVII.

PETRO STROSE MARE-

SCHALO FRANCIAE LVDO-

VICVS REGIVS S. D.

**S**ane quam grauitèr molestè que tui tam subitam fuisse ex hac urbe tuam profectiõem, ut pro eo ac debebam, abeunt tibi præsens bene precari non potuerim, ac ne salutare quidem licuerit quemadmodum iusseras, & ego maximo perè cupiebam. Quod autem hoc tempore, quo à te



locorū interuallo, & bellorum necessitate disiungor, studium relictum est dignitatis tuæ colendæ, omni mea cura providebo, ut quàm maximè exier: & ut scribendus crebrò literis, si modò id officij gratiū tibi perspexero, ac memoria subinde repetendus tuis uirtutibus eximiis, quoad eius fieri possit, præsentia tuæ desiderium minuatur. Quamquam uerò bellicæ laudes tuæ iam pridem in luce Europa, & in oculis aurib'que omnium uersantur: tamen pro mea summa erga te obseruantia non possum nō confiteri, cumulari me magna gaudio, quòd uideam te rebus gerendis socium adiungi D. Gussio, omnis memoria maximo Duci, & esse cum tanto uiro non artissima modò beneuolentia necessitudine, sed etiam consiliorum omnium societate coniunctissimum: segetem quidem, ac materiem certa ostentādæ istius fortitudinis nouam semper suppeditari mirificè letor. Tantam tamen in militari homine eruditionem, tam incredibilem utriusque lingua peritiā, tantum studium cognoscendi semper aliquid aut discendi uel in medio militum clamore, ac tubarum sono, tacitus præterire nullo modo possum. Nam cum omni literarum generi, tum philosophia, cui multū adolescens discendi causa tribuisti temporis, in primis deditus: quantum superest belli & reipub. temporibus, id omne consumis in legendo atque scribendo. Ac suscepisti laborem utilem certè tuæ gentis hominibus, & tibi quidem ipsi honorificum, Commētarios Caesaris, quibus nihil extat in hoc genere scripti elegantius, in Tuscum sermonem transferendi. Quòdque magis mirum uideri potest,

potest, sed hoc ingenio, memoria, scientia & usu rei militaris dignissimum, historiam Henrici regis nostri potentissimi inuictissimi que meditaris. Magnus ipse Dux in omni belli genere, praliis, oppugnationibus, naualibus expeditionibus, omni que bellico apparatu. Quis enim nostrorum temporum consilia atque euentus, quis causas publicorum dissidiorum, rerum gestarum, progressiones, atq; pugnas, aut accuratius explicare, aut maiore testimonij auctoritate literis mandare possit, quam tu, qui illustrioribus nostra memoria bellis, Britannico, Germanico, Belgico, Hetrusco, Romano, Parmensi non interfuisti solum, sed etiam praefuisti? Quod opus si absolueris, tandem aliquando nostra aetati testatum facies, multum interesse utrum historia scribantur à belli rerumque gerendarum gnaris, uel ignaris. Nam saepenumero mirari soleo tum istorum inscitiam, qui tanta rei magnitudinem ac difficultatem animo non satis perpendunt, tum uel maxime qui imparati à reliquis rebus quae sint propriae historiae componendae, ad scribendum se conferunt: cum nunquam hostem, nunquam castra uiderint, nunquam denique ullam partem publici muneris attigerint. Quamobrem gaude tuis istis tam excellentibus rarisque bonis, & frui gloria: quae florescet quotidie magis ac magis, semperque uiuet in hominum mentibus ac sermonibus, multis & praclaris scriptis, cum tuis, tum alienis, ad omnem memoriam commendata. Caterum quod uelle & optare in primis debeo, Deum opt. max. precor, ut in tot tantisque periculis sine periculo uersari possis, tum

LVDOVICI REGII

uerò ut huc breui redeas saluus & incolumis bello ex  
sententia cōfecto. Postremò de me sic existimes ac tibi per-  
suadeas uelim: nihil esse tibi tam promptum, tamque pa-  
ratum, quàm in omnibus rebus, quæ ad tuam amplitu-  
dinem pertineant, operam, curam, diligentiamque no-  
stram. Vale. Lutetia Parisiorum, Idib. Iu-  
niis, M. D. LVIII.

IOANNI BERTRANDO

CARDINALI SENONENSI

LYDOVICVS REGIVS S. D.

**N**ON ego libenter pro plurimis tuis erga me  
beneficiis, hoc uili munere defungor oratio-  
nis: sed quod mihi in hac ingenij fortunaq;  
tenuitate reliquum est, tuebor omni uita  
quàm potero diligentissimè, ut præsens obseruantia, ab-  
sens literis me tibi gratum memorémque præstem. Non  
stetit per te quominus essem ornatio, qui toties de meis  
commodis cum Rege egeris. Nondum tamen labor hic  
noster à prima aetate in literis uersatus, ex benignitate  
principis præsidium ullum firmū consecutus est: nondum  
exoptanti mihi, ac tantoperè cupienti, fructus ocij da-  
tus est ad celebrandas optimas artes, quibus & natum  
& deditum me sentiebam. Quanquam in his difficul-  
tatibus temporum, & asperitatibus rerum, quantiū uel  
per iniquitatem fortunæ, uel imbecillitatem ingenij li-  
cuit, in colendis literis potissimū elaborauī. Non me te-  
nuitas

nuitas rei familiaris, non deplorata toties uoletudinis  
 grauitas debilitauit, non laboris magnitudo retardauit;  
 non raritas aut exiguitas pramiorum reuocauit, quo-  
 minus mihi metipsi in hae uoluntatis perpetuitate con-  
 stare. Quòd si in tanta occupatione Aula atq; uita, nul-  
 lum maioris operæ precium adhuc feci, si fructus studio-  
 rum aut optatis meis, aut expectationi ab initio concita-  
 ta non planè responderunt, non tam culpandus quàm  
 fortasse miserādus sum. *ἢ μὲν γὰρ πευθεῖα, ὥς φησὶ Λουκιανὸς,  
 δεῖται καὶ πῖνα πολλοῦ, καὶ χρόνος μακρὸς, καὶ τύχης λαμπρᾶς, καὶ  
 διαπάνος ὁ σμικρᾶς.* Equidem expecto quotidie prosperum  
 aliquem fortuna statū, qui post tot exantlatos labores  
 tanquam ex longa nauigatione, in portum doctrina ac  
 tranquillitatis peruehat, optatum illum quidem ian-  
 diu, sed multa uarietate temporum toties interclusum.  
 Quò tamen nunquam perueniam sine commendatione  
 eorum qui auctoritate & gratia apud Regem ualent.  
 Difficile est loqui, & non nescis quid uelim, sed dicatur  
 necesse est. *τὸ γὰρ πῶταδ' ἔχ' ὁμολογεῖν τὴν αἰσχρίαν, ἀλλὰ καὶ  
 ὅς φησιν ἑργῶ αἰσχίον, καὶ θαυδῶν.* Quamobrè quoniam  
 tantoperè faues optimarum artium disciplinis, & nobis,  
 quod in summi honoris loco numero, tam benè cupere ui-  
 deris: à te maiorem in modum peto & quæsò, ut quam  
 uultu & uerbis uoluntatem toties significasti, re tandem  
 ipsa declares: & quia spem dedisti, opem etià ferre uelis.  
 Solonem sua ætatis sapientissimum, qui Atheniēsisibus le-  
 ges uiuendi tulit, dicere solitum scripserunt, omnē rem-  
 publicam pramio & pœna contineri. Vbi enim honesti

labores honoribus, atque præmiis decorantur, ibi ingenia pollent, bonæ artes aluntur, omnis generis studia excitantur: alioquin hebescent languentque desidia homines, & desperatione debilitati, nolunt in eo laborare, cui honorem nullum, aut præmium propositum vident. Quòd si mihi meisque studiis honestè erit prospectum, eorum profectò fructus uel in primis ad te redibit: sin à me quid prætermisum fuerit, commissum facinus, & admissum dedecus confitebor. Caterum mihi in animo est scribere de regno Francia, uel de optimo regni statu: atque ab ultimis temporibus repetere maiorum nostrorum instituta: deinde mentem reipublica Francica, morem, disciplinam, temperationem proponere: post quibus artibus domi, militiaeque partum sit & auctum regnum orbis terrarum florentissimum, tum ad extremum, quamnam ratione tandiu stare potuerit, quandiu non aliud eorum Regnorum atque Imperiorum, quæ post hominū memoriā extiterunt. Quorū etiam similitudines ac dissimilitudines peruestigatione comprehendere deliberatū est, ac quæ insuper rerū conuersiones fuerint, & ex quibus causis orta. Utinam modò cogitata efficere possim: magnum est enim opus ac difficile, quod impedito animo, & nisi antè preparato ocio non potest suscipi, & absolui. Siquidem non solum ea sunt explicanda quæ per diu in Aula, aut usquam alibi derebus Fræncicis didici, sed etiam ex media antiquitate, & ex interioribus omnis generis literis eruenda, quæ de maximis Regnis atque Imperiis, de eorum initiis, progressionibus, inclinationibus

tionibus, fideles rerum gestarum scriptores libris cōmen-  
darunt, quæque à doctissimis Græciæ philosophis acutis-  
simè disputata, & tractata uberrimè fuerunt. Verùm  
hoc totum scribendi consilium rationemque ex tuo iudi-  
cio moderabimur: si probaueris, aggrediemur: sin im-  
probaueris, dimitemus. Quippè ea est tua dignitas at-  
que prudentia, is usus rerum, sic denique es de me pro-  
meritus, ut nihil malim quàm arbitrio tuo stare. De qui-  
bus quàm primùm in Aulâ rediero, præsens, ut spero,  
tecum agam pluribus, & dabo operam ut eliciam sen-  
tentiam tuam. Ego institutū meum uertendi Græca se-  
cutus, nuper reddidi Francicè Aristotelis Politica, in hūc  
præcipuè usum, de quo nunc loquebar, quæ propediem  
addetur reliquis nostris trallationibus, quas ex Platone,  
Isocrate, Xenophonte, Demosthene, probatissimis atq;  
eloquētissimis omnis memoria scriptoribus parauī, exer-  
cendi styli, & confirmandi iudicij causa. Vale. Lutetia  
Parisi. prid. Nonas April. M. D. LIX.

## IOANNI BELLAIO CARDI-

NALI LVDOVICVS REGIYS S. D.

**G**uilielmus Pagetus, regis Anglorum cōsilia-  
rius primarius, cui nos per literas commen-  
daras, quandiu in Anglia fuimus, omni-  
bus rebus liberalissimè humanissimèq; tra-  
ctauit: sic ut faciliè intelligeremus quantum esset nomen  
tuum illis in locis, & quantum pondus tua commendā-

LVDOVICI REGII

tio haberet. Nam & ad Regem deduxit, à quo perhonorificè sumus accepti, & quæcunque ad hanc professionem opus fuerunt, dedit operam ut ea mihi in concilio Regis sine ullo meo labore aut molestia conficerentur. Quibus nominibus & tibi qui aditum ad illius amicitiam dedisti, & illi qui externum hominem, licet immerentem, quoad eius fieri potuit, iunxit ornavitque, ea necessitudine quæ sibi tecum intercedit, præcipuè adductus, plurimum debere non fateor solum, sed etiam profiteor ac prædico libenter. Non potui maturius reddere Pageti literas, quibus ille uir tuus respondet, quod & procul abesses, & certorum hominum, qui istuc proficiscerentur, facultas non esset quibus crederem. Itaque necessario mihi rogandus fuit Trecorensis Episcopus, qui negocia tua potiora hîc curat, ut quamprimum cõtingeret illum ad te scribere, meas & Pageti literas uellet cum suis ad te mittere. Vale. Lutetia Paris. XV. Cal. Mart. M. D. LI.

GEORGIO ARMENIACO

CARDINALI LVDOVICVS

REGIVS S. D.



Cum penè eodem tempore huc esset allatum te Archiepiscopum Turonensem esse factum, & in Aulam cum Nauarra rege aduentare: non potui nõ gaudere, uehementèrque letari, quod summum honorem, tuæque eximiæ uirtutis iandiu



iandiu debitū, intelligerem accessisse, & sperare, quā-  
diu hīc esses futurus, perfruendam nobis daturum &  
humanitatem tuam, & sapientiam. Is enim tu uir es,  
eūque te praestitisti maximus in rebus gerendis, grauif-  
simisque legationibus obeundis, ut de dignitatis tuae am-  
plificatione boni omnes iurē debeant letari: ego uerō su-  
pra alios magis, qui moderationem animi tui & equi-  
tatem noui, singularemque beneuolentiam literis etiam  
ad me peramanter honorificēque scriptis proximē per-  
spexi. Qui si affuissem dum in Aulam uenisti, eam ob-  
seruantiam qua te reuereor & colo, coram praestitissem,  
& letitiam quam percepi ex optato aduentu tuo, &  
ex amplissimi istius sacerdotij accessione, declarassem.  
Nam quo rarius ad hāc tantam generis nobilitatem uir-  
tus accedit, quōque difficilior fortuna coniungitur pra-  
stanti eximiaque uirtuti, hōc magis gratulandum tibi  
tenseo: qui cūm longē nobilissimus sis, & fortunae mu-  
neribus ornatissimus, uirtute etiam & doctrina multū  
ceteros praecedas. Vnde optimē uiuendi ratione compa-  
rata, pro nihilo ducis illa ornamenta generis atque for-  
tunae, quae scis esse subiecta sub uarios incertosque casus.  
Quin potius in Deo primū opt. max. deinde in te ipso  
omnem spem reponens tui, neque in prosperis rebus &  
ad uoluntatem perpetuō fluentibus insolescis, neque si  
fortunam reflare contingeret, magnoperē (ut arbitror)  
angerēris, reputans ipse tecum eius uarietatem, rerū-  
que humanarum imbecillitatem. Proinde bonis illis sic  
uteris, ut te dignum, eaque persona quae tibi diuinitus in



LVDOVICI REGII

republica Christiana imposita est. Et quò uberior diuinarum copia suppetit, tantò te geris summissius: quòque ampliorem dignitatis gradum adeptus es, tantò te faciliorem erga omneis, humaniorèmque præbes. Sed nescio quo pacto ad hæc delapsus sum, cum id mihi propositum initio non fuisset. Nos hîc circum uicos & uillas erramus in plurimis maximisque molestiis: quas tamen iam leuat nobis ineuntis ueris amænitas. Nam cedente paulatim hyemis squallore, cælum mitescere, & campi herbis conuestiri incipiunt, totiùsque naturæ uultus renascèntis anni beneficio exhilaratur. Alij aliò profecturos nos hinc dicunt: sed quotidie experimur nihil tam certum in Aula, quàm incertos esse omneis eiusmodi rumores. Regem tamen, ut primùm conualuerit, ad funum Germani rediturum arbitramur. Quod si serius opinione hominum & nostra uoluntate fiet, ego uel Lutetiam usque tui salutandi causa conuolabo. Interim has ad te literas mitti oportere existimaui, grati erga te animi mei testes. Malui enim cum debitam amplitudini tuæ obseruantiam quoquo modo præstitissem, ineptus fortasse uideri, quàm si id non fecissem, inofficiosus haberi. Vale.

Rābouletti. IIII. Non. Mart. M. D. XLVII.

LVDO-

LVDOVICVS REGIVS STEPHANO  
PONCHERIO EPISCOPO BAIONENSI  
*Libellorū supplicum in Regia magistro S.*

**V**Ehemēter dolui quòd te reuifere Arquis aut  
Dieppa non fuerit licitum, antequam mare  
transirem. In causa fuit subita tua profectio  
Fecanum uersus. Intellexi tamen quemad-  
modum Platonis Timæum à nobis Francicè redditum,  
quem Rotomagi acceperas, D. Card. obtuleris: & librū  
à tào principe humanissimè acceptum, cum propter au-  
thoritatem Platonis, tum uel maximè propter commen-  
dationem tuam rescui. Immortaleis igitur ago tibi gra-  
tias, agámque dum uiuam. Sed ueluti in pingendo non  
est satis rem adumbrare, nisi postea suis coloribus singu-  
la appositè illustrentur, nec sufficit unam aut alteram  
partem politissima arte perficere, si reliquum corpus im-  
perfectum ac rude relinquitur: sic debes existimare nō  
satis esse in me commendando elaborauisse, nisi etiam il-  
lius, cui nos commendasti, beneuolentiam nō modò reti-  
nere, sed etiam adaugere in dies contendas. Hoc bonæ ar-  
tes, quarum ab initio ætatis summè studiosus fuisti, à te  
postulare uidentur: quibus negari quicquam abs te fas  
esse non puto, præsertim pro suo alumno agentibus, &  
apud eum qui hæc tanta fortunæ & dignitatis ornāmē-  
ta illis potissimū ferat accepta. Scripsi ad D. Cardi-  
nalem in eam sententiam literas, quas illi reddes ut pri-  
mū occasio dabitur: sed uerborum tuorum elegantia

# LVDOVICI REGII

*suauitatēque prius conditas & ornatas. Vale. Constantiis, V. Cal. Iul.*

## LVDOVICVS REGIVS GVLIELMO

POYETO FRANCIAE

CANCELLARIO S. D.

**P**Hilippus Cossens Constantiensis Episcopus, cuius iussu Gulielmi Budæi uitam explicandam suscepi, auctor mihi fuit ut hunc meum laborem nomini tuo cōsecrarem, existimās, quoniam Budæum paulò antè uita fruentem unicè dilexisti, quicquid de eo mortuo scriberetur, tibi fore gratissimum. Ego uerò tametsi uidebatur id alienum institutis meis, & difficile erat rem hanc tam expectatam & diligentia consequi, & memoria complecti, & oratione exponere: tamen uiro clarissimo atq; doctissimo, & iusta imperanti, & præclara cupienti, non parere nefas esse putauī: eoque magis, quòd non aliunde poteram honestius primam ineuntis adolescentiæ commendationem ducere. Quod autem erat optandum maximè, ut mihi iuris studioso daretur aditus ad te summum iuris antistitem, iurisperitorumque principem, & quod unum ad meas rationes præcipuè pertinebat, id non fortuito, sed propè diuinitus datum atque oblatum uidetur. Quamobrem, quoniam propter obscuritatem in hominū ignoratione adhuc iacui, ad tuam amplitudinem confugio: inde aut præsidia aduersus inuidiam, aut laudi, si qua forte

fortè nascatur, adiumenta quasiturus. Accipies igitur hunc librum, exiguum quidem & tenuem, sicuti nascētia omnia sunt & incipientia, nec tam re & maturitate, qualia solent esse adolescētium, quàm spe fortassis & expectatione commendandum. Quem tamen spero tibi fore iucundum, tum Budæi ipsius causa, cuius honori destinatus est, tum Constantiensis Episcopi nomine, cuius cū essem χριστὸς proprius, tuū tamē esse uoluit χριστὸς τῶν τῶν. Vale. Meloduni, mense Ianuario, M. D. XL.

## FRANCISCO CHEMANO

FRANCIAE PROCANCELLARIO

LVDOVICVS REGIVS S. D.



VM his diebus allatum esset ad urbem, tibi nec opinanti summum magistratum esse mandatum, sanè pro eo ac debui, maxima sum latitia affectus: neque solū mihi ac bonis omnibus gratulandum putavi, quod uirtuti ac literis, quàm tu es, amicior nemo poterat illum in locum, atque in hanc celsissimam sedem dignitatis atque honoris ascendere: sed multò magis reip. Francica, qua turbulentissimis hisce tēporibus eum uirum nancisceretur, qui cū maximis in rebus & gerēdis & sustinēdis, domi & militia, publicè & priuatim, ab ineunte atate exercitatisimus esset, & cum ipsa natura moderatissimus, tum uerò etiam doctrina, atque optimarum artiū studiis eruditissimus. Gaudeo igitur singularem tuam

LVDOVICI REGII

uirtutem, innocentiam, diligentiam, iustitiam & sapientiam, quasi totius orbis theatro tandem aliquando propositam, & in luce Europæ, ipsiusque Franciæ oculis auribusque positam: cumque honorem tibi Deum fortunare quas, à teque ex Regis optimi uoluntate, regniue clarissimi dignitate, administrari. Quam quidem gratulationem ut tuo nomine facerem, præcipue me adduxit insperata orationis tuæ & suauitas & humanitas, qua erga me non ita dudum usus es, cum à Tagaultio medico nobilissimo atque optimo ad te deductus essem. Tam præclarum enim mihi dedisti iudicii tui testimonium, tam magnum amoris signum, dum me bene sperare & bono animo esse tam comiter iuberet, alacritatemque persequendorum studiorum asferres, ut nisi in publica omnium ordinum letitia, totaque urbe ad habendum tibi honorem effusa, maiore quam plerique alij gaudio cumularer, omnem sensum humanitatis merito iudicarer exuisse. Itaque subsecutus illius sermonis tui sententiam, nihil prius habui (cum præsertim diceret, si quando res ita ferret, te nullius operæ libentius quam mea usurum) ut si quid in me est industria, laboris, ingenij, quod tua prædicatione, quam meo merito maius puto, id omne amplitudini tuæ deferrem: arbitratus nihil meæ ætati conuenientius posse contingere, quam tua frui interiore sapientia, teque domesticum habere exemplum omnis uirtutis ad imitandum: ne quicquam mihi honorificentius, quam in familiam tanti uiri cooptari, si quidem ulla in re operam tibi nauare possim.

possim. Igitur rogo te & etiam oro, sic mediisfidius ut magis ex animo non possim, ut si minus opinione literarum, quarum facultas est in me perexigua, obseruantiae quidem planè mea erga te, tuaque erga me beneuolentiae gratia, me in fidem & clientelam tuam recipere digneris. Nihil est quod ab industria, officio, studiisque nostris proficisci possit, quod non libentissimè, immò uerius cupidissime, ad colendam tuam dignitatem sim colaturus. Vale. Lutetiae Parisiorum, mense Iunio, Anno M. D. XLIII.

## FRANCISCO OLIVARIO,

FRANCIAE CANCELLARIO,

LYDOVICVS REGIVS S. D.

**N**Vquam ego penitus intellexeram quanta sit uis amicitiae, nisi ex eo tempore, quo mortis acerbitate ereptus est mihi Franciscus Connanus, uir magno ingenio, admirabili doctrina, singulari prudentia, amplo magistratu praeditus, eximiâque dignitate: cuius consuetudo quid haberet suauitatis, quàmque esset honorifica, carendo magis sensi, quàm fruendo. Itaque cum nullus dolor sit tantus, quem non longinquitas temporis uel minuat, uel molliat, mihi tamen quotidie augefcit magis de illo agritudo: & quanto longius progredior, tanto maiore incendor desiderio, congressus nostros, consuetudinem uictus, doctissimi sermones illius requirens. Nō erat amicitia inter nos

quavis ex causa temerè ac fortuitò primùm orta, sed  
 cùm ille me, opinione fortassis nonnulla, quam de meis stu-  
 diis habebat, ab hinc annos propè decem in familiarita-  
 tem recepisset suam: atque ego interim & admiratione  
 uirtutis eius, & magnitudine obseruantia erga illum,  
 iam non modò ut amicum diligerem, quemadmodum  
 multi uiri præstantissimi, nec solùm ut doctum hominem  
 reuererer, sicut plerique omnes literarum studiosi, sed  
 cum his etiam omnibus in parentis eum loco colerem, cùm  
 diuturna consuetudine, & perpetuis meis officiis magis  
 ac magis quotidie beneuolentia nostra cresceret, ecce ter-  
 tiana febre subitò consumptus est uir ille, & bonis ac do-  
 ctis omnibus cùm prudentia & sapientia, tum beneuo-  
 lentia atque amoris triste sanè desiderium reliquit. Hoc  
 quale fuerit cùm in aliis animaduerti sepiissimè, tum ue-  
 rò in te maximè cognoui: qui quanti illum aestimares, nò  
 solùm ex eo intelligi potuit, quòd uita fruentè tam ama-  
 sti semper, ut plus neminem: tanti autem fecisti, ut te illi  
 uni inter ceteros eiusdem ordinis homines multum tri-  
 buisse uniuersa Gallia sit testis: sed etiam quòd mortuùs,  
 quoties in eius mentionem incidis, honorificètissimis uer-  
 bis perpetuò prosequeris, & uerissimo tuo testimonio,  
 grauissimòque iudicio non intermittis ornare. Ac sanè in  
 eo declaras id quod antea egeris, non uicinitati tantùm,  
 quæ in propinqua parte necessitudinis putatur: aut assi-  
 duitati erga te, in qua omnes gratas amicitias atque etiã  
 pias propinquitates uincebat, sed magis adeò uirtuti ac  
 meritis ipsius tribuisse. Tales nimirum amicitia coniun-  
 ctionisque



Etionisque necessitudines inter præstantes homines intercedere solent, quæ nullis aut temporum aut locorum interuallis dirimuntur, nulla uarietate fortuna, nullis casibus immutantur, ac ne morte quidem ipsa, quæ cæteris rebus omnibus finem adfert, deponuntur, sed cùm uirtute quæ immortalis habetur, nitantur, ad sempiternam memoriam temporis prorogantur. Superiore æstate rus cum uxore ac liberis concesserat, ut ibi nulla ui interpellante, uacuis ab interuentoribus, liberius & solutius in literis uiueret. sæpè enim à fluctibus uel aulicis, uel urbanis, forensisque tempestate, quam inductione quadam animi, atque uoluntate refugiebat, tanquam in portum, se in solitudinē recipiebat prædij Lusertiani, quod octauo lapide ab urbe situm Briam uersus, possedit ac præcipuè coluit: ubi occupationibus animum relaxabat, & quasi in iucundo studiorum suorum diuersorio requiescens, sibi ocium sumebat ad commentādum: in quo præclaras ingenij cogitationes literis mandabat: in quo multiplicem ac uariam iuris scientiam ratione & uia tractabat, omnemque doctrinam inuestigabat atque contemplabatur. Iam maiorem ætatis partem ruri traduxerat: cùmque in urbem mense Augusto reuertisset, credo ut tibi eò aduentanti obuiam procederet, postridie eius diei caput tentari febre tertiana. Rex eo tempore redierat ex Andium & Britonum sinibus Fontanebleaum: cùmque ego ex amicis qui Lutetia ueniebant, sciscitarer de Connano nostro, ut ualeret, comperi illum morbo teneri. percussit ilicò animum. Sic enim abhinc triennium



bis grauiter diuque agrotauit: nunc appetit Autumnus: multi morbi, & quidē mortiferi, ubique hoc grauiſſimo anno ſeuiunt. quā uereor quorſum hic euadat? Iduo poſt cōceſſi Lutetiam, maximē admodum ut illum omni genere neceſſitudinis, omnium conſiliorum ſocietate coniunctiſſimum ſalutarem. Fuerat illo die miſſus ſanguis, quod equidem miratus ſum in ea corporis macie & gracilitate: medici tamen eo conſilio à ſe factum dicebant, ut tertianæ cauſam tollerent, nè in quartanam conuerteretur. Iam adueſperascebat, & is multo ſudore frigido manabat, ac leuiter ſomnus eum cōplectebatur: quamobrem non licuit id temporis hominem uidere & affari. Poſtridie conſtitueram omne pomeridianum tempus illi tranſmittere, & idcirco apud te prænſus eram: cū ecce ſub exitum prandij, de morte Connani allatum eſt: illūque ſub meridiem è uita exceſſiſſe, die ſexto quā agrotare cæperat, nunciatum. Fuit hoc mihi luctuoſum, acerbum ſuis, graue lueris, omnibus bonis triſte: Nam quò rariores ſunt qui probitatem morum cum eximia literarum grauiorum intelligentia coniungant, & eloquentiam reconditioribus artibus locupletent, hoc grauiorem fecit iacturam ætas noſtra in eo homine, qui & optimus uir fuit, & iuriſconſultus eloquentiſſ. & omnium aliarum artiū diſciplinis inſtructiſſimus. Erat in eo, ut dixi, ſumma gracilitas, & raritas corporis, qui habitus & quæ figura non procul abeſſe putatur à uite periculo, ſi animi contentio uehementior accedit. Igitur in eum intuens qui erat mihi chariſſimus, pro illius erga

me beneuolentia, & mea summa erga illum obseruantia, quòd se in suis perennibus studiis contineret, nonnūquam hortabar & monebam, ut id quòd ageret, temperatius ageret: ne per incuriam corporis, in morbum toties incideret, quo celerius sua opinione, atque omnium expectatione, abriperetur: uti modum studio faceret, & effusam illam sine intermissione contentionem meditandi, legendi, atque scribendi reprimeret: non committendum ut laborum nostrorum flores exarescerēt antequàm fructus pariant, & maturitatem assequantur: ingrauescentem atatem illis demetendis aut percipiendis accommodatam. Et ut oratio plus ponderis apud illum haberet, proponebam quoque Platonem, quem tum in manibus habebam, longè omnium qui scripserunt aut locuti sunt, & maiestate sententiarum, & elegantia uerborum principem, admonētem in Timæo, uti quandiu hac lucus usura frueremur, non minorem corporis quàm animi curam gereremus, quòd malè affecto corpore animi muneribus fungi nequeamus. In curando autem corpore imitari oportere naturam uniuersitatis rerum altricē, quæ nihil in mūdo, ad cuius similitudinem facti sumus, ociosum pateretur, sic ut nunquam obtorpere permitamus, sed quantum est situm in nobis, moueamus illud semper, & moderatis exercitationibus ad perferendos labores corroboremus. Sin eo neglecto animum solum coleremus, fore ut potentior factus exultaret atque efferretur, totūque ipsum intus agitans, languoribus imple-ret. Quinetiam cū ad discendum inuestigandūque

# LVDOVICI REGII

uebementius incumberemus, labefactare corpus, nonnunquam & inflammare, ac non expectata morte necessaria dissoluere, praesertim si contentio acrior adiungeretur: adduci tamen, ut aliquantum de summo illo studio remitteret suo, non potuit. Itaque dum literarum cupidior quam lucis esse pergit, dum hoc sublato bono uitam nihili putat, dum ualitudinem negligentius curat, uires corporis sic afflixerat & prostrauerat, ut leuissima febris adueniens eum perbreui de medio sustulerit. Ingrauescente morbo, cum iam dubia spe uita spiritum duceret, nihil à pristina sua uirtute alienum fecit, non uocem ullam anteacta uita indignam edidit: quin ab astantibus admonitus salutis, respondit hanc semper sibi cura fuisse, sed doloris uictum debilitatumque magnitudine succumbere. Tandem uero sine ullo corporis aut uultus motu ita tranquille placideque decessit, ut non è uita ad mortem, sed ex labore ad quietem, ex atate breui ad perpetuam, ab exilio hoc quidem misero ac permolesto, ad iucundissimam beatissimamque illam animorum patriam, Dei opt. max. sedem atque solium migrare uideretur. Sic magno fortuna casu accidit, ut quem uiuum & incolumem uidere maximopere cupiebam, ei flens ac maestus cum ceteris parentarem. Perijt tertio & quadragesimo aetatis anno, Cal. Septembr. Anno salutis generis humani M. D. LI. atque Lutetiae in D. Opportuna sepultus. Quamquam igitur post tot amicorum funera, post tot accepta fortuna uulnera, iam mihi uiderer ferendis calamitatibus diuturna consuetudine

callum

callum obduxisse, dici tamen non potest, ne cogitari quidem satis, quantum ex eius interitu dolorem uel maerorem potius acceperim. Sed meipse consolor, & maxime illo solatio, quod uirtus & doctrina illius, quas coluimus amauimusque, non sunt extincta, sed uiuunt semperque uiuent in doctorum hominum mentibus ac sermonibus, alentur aeternitate, & augebuntur totius posteritatis memoria. Etenim cum non solum ingenio & doctrina, sed etiam ocio studioque abundaret, commentarios iuris Civilis scripsit ualde quidem probandos, cum propter elegantiam, tum grauitatem rerum quibus referti sunt. Qui tandiu, ut mea fert opinio, in manibus habebuntur, quoadiu Romanae litterae stabunt, quandiu civilis prudentia, quandiu iuris dicendi ratio ulla inter homines manebit. Fuit autem propositum, eius disciplinae penè infinita uim & materiam uel scientiae peruestigatione, uel differendi ratione comprehendere. Docendi quidem certè rationem ac uiam accuratorem, quàm quae in recētoribus, atque adeò in ipsis planè ueteribus iurisconsultis casareisque constitutionibus reperitur, adhibere uoluit, ac profectò iuris artem instituere. Magnum opus & arduum, atque haud scio an de humanis operibus longè difficillimum. Enimuerò cogitanti mihi saepenumero, & in summos homines intuenti, qui abhinc annorum duo millia, artis ad bene beatèque uiuendum necessarias aut inuenerant ipsi, aut inuentas literis illustrauerant, & perpoliuerāt, solus Aristoteles ex omni memoria aetatum, temporum, nationum, occurrit naturae quadam prouidentia genitus.

qui ea quæ prius in diuersis artibus dispersa & dissipata fuerant, in dextrâs conglutinauit, quadamque ratione constrinxit. Cateri mihi uidentur tanquã partus degeneres, uel non præstitisse quod polliciti sunt, uel nõ perfectisse quod ab illis expectabatur. inchoata quidem plurima, & magna ex parte cõfusa permixtâque reliquisse. Quod si scientiæ tantum instituuntur rerum uniuersarum & sempiternarum, quæ intelligentia & ratione comprehenduntur, quæ sunt maximè secundũ naturam; & procul absunt ab opinione, quæ semper eadem atque eodem modo sunt apud omnes, quæ in unum exitum spectant, & nunquam fallunt, equidem non uideo quemadmodum ars certa iusti & iniqui constitui possit, quorum tanta est per uniuersum orbem terrarum differentia, quæque nõ tam per seipsa, quàm pro legibus, ritibus, moribus, consuetudinibusque ciuitatum, nationum, gentium considerantur. Præterea quorsum tot responsa iurisconsultorum mutila & decurtata? tot edicta prætorum? plebiscita? principum constitutiones? senatusconsulta? quorum constat maiorem partem ipsa uetustate consensuisse, aut tacitis populorum consensuibus mutatam, aut emergentibus nouis quotidie legibus, aliis super alias acernatis, esse sublatam. An ut reliquæ omnes gètes regantur ex præscripto unius ciuitatis? quæ uarias mutationes habuit: quæ quandiu libera fuit, perpetuis seditionibus plebis & optimatum laborauit, & postquam dominationi Caesarum paruit, omnis memoriæ deterrimos principes tulit, ex quorum placitis totũ hoc ius Romanorum

manorum, quod uidemus, conflatum est & effectum? Quòd si omnium aliarum rerumpubl. cùm priscarum, tum recentium, quæ bene morata benèque cõstituta fuerunt, instituta animo percurramus, nūquam in his reperiemus iuriconsultos extitisse qui libellos consicerent de pactis & transactionibus, qui stipulationum, iudiciorum, exceptionum formulas componerent, qui docerēt quemadmodum in iure cauendum, & quid de quaque consultatione respondendum esset. Non apud Athenienses, & Lacedæmonios, à quibus iuris Romani initia ducuntur. Non apud Assyrios, Carthaginenses, Aegyptios, Persas, Macedones, Gothos, Vandalos, Saracenos, quorum ditiones ampla fuerunt. Longum esset, & non necessarium, commemorare de omnibus. sed si qui id genus hominum indulgentius aluerunt, constat apud eos omnia litibus arsisse: quemadmodū olim usu uenit Romanis, & paulò ante nostram memoriam in Pannonia accidisse Viues refert, ac nūc magno nostro malo in Frācia experimur: ubi omnia gymnasia, fora, tribunalia uocibus iuriconsultorum personant. Quis enim nominis Francici amans non miretur, uel doleat potius, in tanto numero magistratuum ac legum aceruo, lites infinitas atque immortales haberi? nihil tam certū, quod non in dubium uocetur: nullam cõrouersam tam expeditam, quæ non impeditissima reddatur? nullum contractum tam stabilem, qui non rescindi: nullam sententiam tam firmam, quæ nō perfringi possit? omnia harpyiarum forensū calumniis, dolis, fraudibus inuoluta? ipsam prisci



iuris maiestatem cautionibus & formulis deformatam obsoleuisse? his denique moribus germana iustitia effigiem amplius nullam inueniri: umbra nos tantum & imaginibus uti, quas etiam utinam (quod Cicero sua aetate querebatur) retineremus? Quantò melius cum humano genere ageretur, si omisissis tot legibus scriptis, earumque malitiosis interpretationibus, quæ non tam controuersias tollunt, quàm litium actiones constituunt, summam illam legem, iuris atque iniuria regulam sequeremur, quæ uniuersum mundum regit imperandi prohibendi-que sapientia, quæ non populorum iussis, non principum decretis, non sententiis iudicum aut scripta est, aut confirmata, sed seculis omnibus antè nata quàm scripta lex ulla, aut quàm omninò ciuitas constituta: quam non didicimus, accepimus, legimus, uerùm ex natura ipsa arripuimus, hausimus, expressimus: ad quam non docti, sed facti, non instituti, sed imbuti sumus: ut honestè uiueremus, fidem seruaremus, alterum non laderemus, suum cuique tribueremus, controuersias inter nos ortas ex aequo & bono breuiter uel per arbitros cõponeremus, uel per iudices terminaremus. Cuius quidem iustitiæ naturalis si quis primas & inchoatas intelligentias, quas in animis habemus impressas, explicauerit, si ea quæ obseruata sunt in usu forensi, & communi ratione iuris dicendi animaduuerterit ac notarit, uerbis designarit, generibus illustrarit, partibus distribuerit, id quod Conna-num nostrum fecisse uidemus: præclare medijsfidius is erit de humano genere mereri iudicandus, nec dubitan-

dum,

dum, quin si non planè artem, at quasi artem iuris inuenisse dicatur. Nō ut omnia quæ illa arte effici possunt, inde petantur, non ut legem uno quoque uerbo in ore habeamus, non ut sexcēta capita sine delectu effundamus, innumerabiles doctores indoctos illos quidem, ac certè nō necessarios ad ostentationem memoriæ & lectionis proferamus, non denique ut quicquid deliberandum, agendum, statuendum nobis proponamus, ad rubricas reuocemus: sed nimirum ut cognitis primis ac certis rebus, reliqua, quia aut faciliora sunt, aut similia quisque pro suo captu persequatur: quippe quæ accendi aut commoueri præceptis ueterum possint, inseri quidem à libris nō possunt. Profecto aut me fallit opinio, aut nihil à restitutis lîteris in hoc genere scripti in lucem prodiit, quod sit cum commentariis Connani uel differendi ratione ac subtilitate, uel dicēdi elegātia & proprietate, uel rerū delectu & ordine comparandum. In quibus si quid occurreret quod lectori erudito non faciat satis interdum, ut in tanto opere credibile est quædam ei humanitus excidisse, æquum erit ignoscere: atque eò magis, quod immatura morte præuentus, extremam manum maximè posteriori parti addere non potuit. Quod si perfati necessitatem in uniuerso opere eandem diligentiam adhibuisset, quantam in tribus libris prioribus, quos toties ea cura limauerat, ut ter aut quater propria manu describere non fuerit grauat, facile omnium superiorum scriptorum gloriam, non modò styli felicitate adæquauisset, sed etiam diligentia uicisset. Magnum enim eius iudicium



## LVDOVICI REGII

fuit, magnumque optimarum artium studium, tum omnis liberalis & digna iuriconsulto ab eo percepta doctrina. Qui puer admodum educatus in disciplina doctissimorum praeceptorum, sed potissimum Iacobi Spisamaei uiri clarissimi, nunc pontificis Niuernensis: apud quem philosophiam Aristotelicam didicit, & cui ex omnibus plurimum detulit. Deinde ut primum ab his artibus, quibus aetas puerilis ad humanitatem solet informari, se ad ius civile contulit, primum Aureliae, nobili & celebri urbe, Petrum Stellam audiuit, post apud Biturigas Andream Alciatum Mediolanensem, quem nostrae aetatis multo praestantissimum iuriconsultum fuisse uerè uideor posse contendere, nec minus optimis artibus eruditum. Inde Lutetiam reuersus, in iuriconsultorum subselliis per diu uersatus est: ibi rationum regiarum, continuo libellorum supplicum in pratorio magister factus: in quo magistratu per vii annos admirabili quadam laude uersatus est. Accedit eò, quòd domus eius semper patuit, semperque referta fuit uiris doctis, quanquam doctrinae suae dissimulator magis fuit quam ostentator: nemo parcius loquebatur, nemo minus aliis sese uenditabat. Non scribebat ad aucupandam gloriam, sed ad animi oblectationem: sorte sua contentus, nec rem amplificare, quam honestam possedit, studebat, nec honoribus maioribus inhiabat. Quid dicam de moribus facillimis? de pietate in Deum? bonitate in omnes? iustitia in illos qui eius opera utebantur, aut qui aliquid negotij cum ipso habebant? Sic uita erat, nemini nocere, prodesse uerò quibuscunque posset, non solum bene agendo,


agendo, sed etiam scribendo: ita ut facillimè sine inuidia laudem inuenires, & sine obrectatione gratiam pararet. Quæ mecum ipse considerans, equidem incipio castigare imbecillitatem meam, ac iam illius mortem non misericordia, sed beneuolentia potius prosequendam duco. Quid enim longius à luctu, quàm uita gloriosa innocenter acta? & mors beata, licet immaturè appetita? aut quid laudandum magis quàm optimarum artium studium, & præclara ingenij monumenta ad sempiternam hominum memoriam literis commendata? Nihil est igitur quod tua causa, mi Connano, doleamus. Si quid mali accidit, nobis accidit: qui honorifica tua consuetudine, humanitate singulari, recondita eruditione, suauissimis sermonibus, prudentissimis consiliis in perpetuum sumus destituti. Tu aduersas res nostras subleuabas, secundas ornabas, in dubiis consilium dabas. Tu arbiter scriptorū nostrorum, moderator eras studiorum: nō erat quisquam mortalium te mihi charior, aut in cuius prudentia libentius acquiescerem. Quapropter si nullū fuit beneficij genus, quod in me, licet immerentē, licet sola literarū commendatione tibi primū cognitū, non contuleris, & tibi uiuenti nullum contrā amoris, nullū obseruantie, nullum studij officium à me defuit, ego ne tam expers humanitatis reperiatur, ut tui nunc obliuiscar? Sed quid ego in hac mea mediocritate possum? An tua in me beneficia commemorem? at nunquam, ea mente contulisti ut euulgerentur. An celebrem uirtutes? at in illustri gradu dignitatis collocatæ, toti Gallia notæ fuerunt. An libros abs te

# LVDOVICI REGII

scriptos uerbis ornem? at propter elegantiam grauitatemque rerum, quibus referti sunt, & commendantur maximè, & quotidie ab omnibus expetuntur. Quid quòd, dum uiueres, non tam pramia sequebaris rectè factorum, quàm ipsa rectè facta? non laudis studio trahebaris, non gloria ducebaris, sola optimæ mentis conscientia nixus, quæ tibi semper pluris fuit, quàm hominum sermo. Tu tamen, intereà dum à percipiendis atque cognoscendis optimis artibus, nec earum magnitudine ac difficultate, nec innumerabilibus aliis rerum asperitatibus deterremur, præsertim tam raris ad discendum propositis hoc seculo præmiis, dum doctrinam ad exemplum ueterum non modò ex libris & in umbraculis ocioque eruditorum, sed ex omnium rerum usu & uarietate querere conamur, nihil, quantum est situm in nobis, terra & mari, domi & militia, apud nos, apud externos intentatum relinquimus: nunc in foro uersamur, nunc Aulam sequimur, dum in persequenda sciètia & sapientia omnes labores, curas, molestias parui ducimus: postremò dum nostris studiis portum querimus, à quo iam non semel restantibus uentis reiecti sumus, accipies hæc dona inania, & quasi inferias, quas sanctissimis tuis manibus in mediis nostris occupationibus, & erroribus aulicis offerimus. Sed nescio quomodo hic me æstus amoris in altum longius abstraxit, quàm aut uellem, aut initio fuerat propositum. Ego uerò cum de eo aliquid uellem scribere, tibi potissimum id munus conuenire arbitrabar, quod duorum amplissimorum hominum

minum memoriam esset in posterum, uel etiam beneuolentiam propagaturum: ut ita utrique, etsi nequaquam parem uestris uirtutibus, at pro nostro tamen studio, debitam gratiam, tibi educationis, illi familiaritatis, quoquo modo referrem. Quid enim poterat mihi, uel ad usum literarum melius, uel ad præsentem existimationem honorificentius, uel ad reliqui temporis expectationem maius accidere, tanti uiri consuetudine atque conuictu? Ecquem potius quàm te magnum iuris antistitem, iustitiæque præsidem secutus essem? apud quem ea qua legendo ab ineunte ætate didiceram, usu & exercitatione frequenti cumulatora redderem, & perfectiora: tum uerò earum rerum qua uersantur in consuetudine uitæ, in hac societate ciuili, qua ad mores hominum, & ad rempublicam præsertim nostram pertinet, cognitionem mihi pararem uberiolem, atque scientiam. Quamobrem si quid est in me ingenij, quod sentio quàm sit exiguum, aut si qua ab optimarum artium studiis profecta facultas, earum rerum omnium uel in primis fructum à me repetere propè tuo iure debes: qui me in contubernio tuo plures annos honorificè aluisti, ac præceptis propter excellentem eruditionem, & exemplis propter eximiam uirtutem auxisti. Itaque cum in te colendo obseruandoque plus elaborauero quàm possum, minus omninò faciam quàm debeo, beneuolentiâ fortassis imitabor, partem certè minimam tuorum meritorum non modò referenda, sed ne cogitanda quidem gratia consequar unquam. Cathalauni. Cal. Maiis, Anno M. D. LII.

LVDOVICI REGII ORATIO  
AD CVRIAM PARISIENS.

 Voderat mihi optandū maximē, ut aliquādo in hoc amplissimo Galliarū loco, ac clarissimo totius Europæ cōcilio, specimen ingenij darē, & laborū, quos ab ineunte atate suscepi, fructū ex doctissimorum hominum atq; integerrimorum senatorū iudicio cōsequerer, id nunc datū oblatūmq; uehementē laturer, si usitata ratione probandorū magistratuum, & recepto superioribus annis more id fieri liceret. Sed noua lex impedimento est, quæ ad religionem uestram, Iudices, addidit non ferendorum modō suffragiorum seueritatem, sed difficultatem etiam ex tempore de iure respondendi. Quæ dum animo contuerer, sæpē multūque dubitauī, satinsne omninō foret, delatum ab optimo principe magistratum recusare, quā tātā rem, tam lubricam atque ancipitem suscipere, quā paruo momento omneis opes fortunæque meas, omnem existimationem ac spem reliquæ uitæ, in discrimen adducere. Nam hodierno die eam potestatem omnem uos habetis, ut statuatis utrum hanc indolem nondum firmata stirpe uirtutis, tanquam subita tempestate perueratis, an plenam spei alicuius, & nunc primū agre florentem alatis. Enimuerō si nouos magistratus illius legis statera, & uestre eruditionis trutina examinaueritis: quis erit tam insigniter doctus, aut tam summē impudens, qui ad omnia quæ de

de iure dici possunt, suscipiat, ac profiteatur se ex tempore esse responsum. Est magna quidem & praeclara certè iuris civilis sciētia, recondita, multiplex, subtilis, nulla tamen certa ratione ac uia conscripta, cuius infinitam uim & materiam qui penitus cognitione comprehenderit, arbitror posse reperiri neminem. Neque uerò hac mea oratio eò spectat, ut legem inconsideratius latam uelim ostendere: sed ut, cū eius uerba nimia seueritatis plena esse uideritis, uolūtatem Regis optimi qui eam tulit, consiliūque uiri prudentissimi qui rogauit, amplectamini. Certum est enim Franciscum regem illato à duobus potentissimis principibus graui periculo quoque bello, inopia ararij pressum, difficultate temporum coactum, non curias modò ipsas, sed inferiora quoque tribunalia quamplurimis nouis magistratibus impleuisse. Cuius rei cū illum pæniteret, rebus compositis, paulò antè quàm e uita excederet, hanc legem tulisse, quae redundantem iudicum turbam coërceret, & imminutam uicio temporum iustitiæ maiestatem in ueterem dignitatem uindicaret. Quinetiam in perfecto iudice non solum iuris intelligentia spectanda est, sed multa sunt artes & uirtutes eximia huius administra comitesque facultatis, ueluti innocentia, grauitas, fides, integritas, modestia, ueritas, sine quibus omnis cognitio manca est & inchoata: quæque nec ex dissipatis ueterum iuriconsultorum libris, nec ex uerbosis recentiorum commentariis peti possunt: & tamen in probandis iudiciis sunt in primis considerata. Quæ cū ita sint, Iudices, quæso



à nobis ut in nostra causa asperitatem edicti humanitate uestra mitigare uelitis. Nam cum principes nostri liberam huic ordini dederunt causarum disceptationem, & constitutiones suas, aliâque rescripta, ius ex uestris suffragiis accipere uoluerunt: nimirum crediderunt illos, quos ob singularem industriam, perspecta eorum fide & grauitate, ad huius loci amplitudinem adhibuissent, non controuersias modò priuatas ex æquo & bono sublaturos, sed publica etiam negocia, pro sapientia ac luce dignitatis suæ, pro uarietate rerum atque personarum, ex communi utilitate tractaturos. Quòd si unquam aliàs erga quemquam ulla facilitate atque humanitate citra officij religionem estis usi, uos oro atque obsecro, Iudices, eam mihi ut hodierno die tribuatis. Qui uero summa haberem cætera digna hoc confesso, digna hoc magistratu qui mihi delatus est, à quibus equidem absum longissimè, temporis certè uix satis habui ad hæc mea studia recolenda, sed nec quibus de rebus apud uos dicturus essem, per edictum potui ullo modo cogitare, ut paratior ad dicendum uenirem. Quòd mitius agere mecum deberis, reputantes ipsi uobiscum tum humani ingenij memoriae nostræ imbecillitatem, tum etiam iuris ciuilis magnitudinem atque difficultatem. Nam quamquam inficiari non possum me à primis temporibus ætatis, omnis artis ingenuæ disciplinæque ciuilis percupidum fuisse: Aulicæ tamen ærumnæ ac molestiæ, quæ me multos annos districtum tenuerunt, plurimum de flore ætatis, ingenij, studiorumque delibauerunt. Quamuis enim consuetu-

suetudine perhonorifica usus primùm Francisci Chemanij Taurinorum præsidis, deinde Francisci Oliuarij Cancellarij, uirorum clarissimorum atque præstantissimorum: tamen crebra & propè diurna locorum mutationes, assiduus salutandi labor, tot rerum offensiones occupationesque parum admodum, aut nihil omninò temporis, hisce nostris literis relinquebant. Verùm ego haud magna in re constitutus, præsidio nullo tectus, sola literarum commendatione, eaque permediocri fretus, non aliter poteram ex illis uadis & scopulis emergere, atque honori meo uelificari. Itaque quibus potissimùm rationibus uos adduci posse sperarem, ut tam periculosam anticipemque dimicationem remitteretis pro tempore ac loconimium, pro rei magnitudine parum, pro uestra prudentia satis uideor dixisse. Quibus si minus permouemini, noua legi pareamus, uoluntati uestra obtemperemus, Iudices, atque onere officij nos opprimi potius sinamus, quàm locum qui ab optimo principe nobis cum fide semel datus est, propter infirmitatem animi deseramus. Magnum opus atque arduum tentamus, idque non tam satisfaciundi uobis spe, quàm progrediendi, quātum possumus, uoluntate. Quod si difficilius uidebitur quàm ut à nobis suscipi debuerit, uelim existimetis, dum legibus parere cogeremur, refugiendi pudore, dicendi ex hoc loco necessitatem suscepisse.



ALIA ORATIO IN SCHOLIS TOLOSANIS.

**P**ythagoram Samium præstanti sapientia & nobilitate philosophum, cum in aliis rebus magnum ac probatum uirum, tum in eo summum ac singularem fuisse comperimus, quod illos qui sese in disciplinâ homini tradebant, tacere quamdiutissime iubebat, nec prius disputandi & percontandi quæ uellent, potestatem faciebat, nisi longo silentio docti fuissent. Hoc tanti philosophi diuinum institutū si teneremus hodie, cū in aliis artibus, tū in iure civili, haberemus (ut mea fert opinio) disciplinas omnes florētiores. Nūc ut alia multa, sic hoc præposterè fit, ut plerique de bonis artibus antè disserat, quàm de illarū utilitate & magnitudine aliquid suspicari potuerint: & prius ad docendum ueniant, quàm id ipsum quod suscipiunt, nouerint, aut omninò quale sit, didicerint. Quæ dum mecum cogitarem, Auditores optimi, tametsi quadriennio studiorum causa hac in urbe eram commoratus, atque totum curriculum industriæ meæ in iure civili elaboraueram, tamen omne meum tempus priuatis studiis transmittere malebam, quàm temerè ad docendum excurrere. Sic me hoc aditu laudis, qui semper cuique studioso patuit, non mea solum uoluntas, uerum etiam conscientia infirmitatis nostræ, & pudor quidam prohibuit, ne aut id profiteri uiderer quod nō possem implere, quod est impudentia: aut id non efficere quod à me expectare-

tur, quod est negligentia. Sed cum priuati nostri ex iudicio doctissimorum hominum aliquem fructum consecuti essent, mutare consilium coactus sum. Nam ut iuris consulti in ordinem suum me cooptarunt, id onus officij mihi imposuerunt, quod abiicere nefas esse duxi, non minus propter eorum auctoritatem, quam nullo modo debeo aspernari: quàm propter singularem in me beneuolentiam, quam cupio omni ratione tueri. Quamobrem suscepi, Auditores optimi, magnum profectò munus in tanta hominum frequentia publicè de iure disserendi, idque suscepi non obeundi fiducia, sed uerecundia recusandi. Quid enim est quod aut eniri aut efficere possim, qui toto cursu studiorum, magnis interim uulneribus ictus, morte Ioannis Pini Riuorum Episcopi uiri clarissimi, in quo uno tuendorum studiorum nostrorum spes omnis erat posita, tum grauitate diuturna quartana, prætereà infinitis aliis molestiis oppressus, nunquam animo uacuo & soluto in eam potui disciplinam incumbere? Quid quod uereor ne nouitas nostra plerisque inuisa sit & suspecta, quòdque nunc primùm animum ad docendum appuli, eo minus libenter me audiant? Sed par est illos cogitare, omnium rerum principia parua esse solere, deinde suis progressionibus usa augeri. Non enim ut semen mādaturum est terræ, protinus demetitur, sed elicitur primùm ex eo herbescentis uiriditas, quæ suo tempore adolescit, ac tandem ad spicam peruenit. Nec ut ad articulos sarmentorum gemma existit, continuò uua percipitur, sed inde oriens, ac sese ostendens, post succo terræ

# LVD. REGII ORATIO.

3  
 & calore solis augetur, quæ initio acerba fuerat, ad extremum maturata dulcescit. Quinetiam natura corpus hominis ita & formauit & genuit, ut in primo ortu tenerum esset ac molle, deinde progrediente aetate cresceret, ac robustius fieret. In disciplinis uero quis non uideret omnem earum laudem ab humili paulatim ad summum uenisse? Quod si natura in omnibus rebus hoc fert, ut nihil simul nascatur & perficiatur, hanc progressionem in his quæ ex terra generantur, admirabimur, in docendo non feremus? & si usitatam in aliis disciplinis probamus, in iure civili repudiabimus? quodque salutare maturitati frugum ac fructuum dicimus, id maturitati iudicii non utilissimum iudicabimus? Sed omnium artium, sicut arborum, magnitudo nos delectat, non item radices atque stirpes. Veruntamen esse illa sine his nullo modo potest. Quapropter uos oro atque obsecro, Auditores optimi, ne me idcirco aspernemini quod nondum huius auctoritatem loci contigerim, nec statim repudiatis, si tardior initio aut rudior uidear, illud interim uobiscum reputantes, neminem repente summum extitisse, nec non illis qui modo præstant iuris civilis scientia, fuisse aliquando, ut nunc mihi, alicunde arripiendum ad claritatem exordium.

LVDOVICVS REGIVS LAN-  
CELOTO CHARLO EPI-  
SCOPO S. D.

**A** Mor tuus, ac iudicium de me, utrum mihi plus ornamenti, an scriptis meis commendationis asserat, non facile dixerim. Nam cum doctrina ac eloquentia, omnique probitate excellas, maximopere lator me meaque tibi probari. Illud uero tua in me uoluntatis documentum uel maximum dedisti, cum pondera sententiarum ac uerborum propè singulorum in nostris scriptis tam diligenter examinares. Quæ si mihi potestas sapius contingat, ne ego multò libentius ad scribendum animum inducam, cum tuo accuratissimo iudicio, tum nonnulla mea diligentia melior factus. Sic enim te existimare uelim, cum à te docto in primis uiro & ualde humano discefferim, neminem esse sub cuius censuram me tam esse subiectum, non solum confitear, sed etiam gaudeam. Quamobrem quacunque prius scripsi in hac tanta occupatione Aulae atque uitæ, uel posthac scribā, maiore studio ocioque abundans, ad arbitrium tuum libentissimè, ac multò uerius cupidissimè conferam. Nunc autem mitto epistolam, à me quidem olim scriptam, sed nuper recognitam: in qua ego cum Bunello uiro docto & eloquenti disputo, an post tot ueteres auctores, in tanta librorum turba, sit aliquid scribendum. Multa reperies ex omni antiquitate, & è media philosophia repetita, quæ, nisi me fallit animus,

# LVDOVICI REGII

*tibi neniquam displicebunt. Quæ tamen uelim sic accipias, ὡςπερ εἰδοῦσιν λόγον μαΐετος, ὅτι πᾶ μύλλω συγγράφαι πρὸς Ἀρχῆς καὶ Ἐπιστάτας τῆς παιδείας ὅπως τ' αὖ τέχνη καὶ ἐπιστήμης πολλάκις δορυται καὶ ἀπέλλωτο, διὰ πολλὰς αἰθερώπων φθορὰς, αἱ χρίσας καὶ ἰσθίται τὴν παρὰ κλάσει τῆς πρὸς γλῶσσαι καὶ κατ' ἑρκεῖον ἰόντων, πνεὺ μὲ καὶ ὕδατι μίγνται, πάλιν δὲ καὶ ἰθὺς μεταμιτμοῖς, καὶ ἀφελίπτως μεταβολαῖς, καὶ μνείαις ἄλλαις ἔπεκει.*

*Igitur propositum est exponere literarum initia, incrementa, progressus: deinde quemadmodum, & quibus temporibus ac locis philosophia & eloquentia ad summum uenerunt, & postea corruerunt: tum denique quid hac ætate in omnibus disciplinis profectū, quid additum, & inuentum: in quo pares antiquis, in quo superiores, aut inferiores sumus. τὴν γὰρ ἰστορίαν & αἰτῆν, illud omnino examinandum duxi, uerū ne sit uulgò quod dici solet, NIHIL DICTVM QVOD NON DICTVM PRIVS. Magnum opus, Charle, & arduum meditor, sed onus hoc laboris si abs te probari intellexero, suscipiam quamprimū erit ocij satis ad scribendum. Te rogabo interea, ut me, si mereor, perpetuò diligas. Vale. Fontaneblai, XIII. Cal. Maias.*

## LVDOVICVS REGIVS PETRO BVNELLO TOLOSATI S. D.



*Acobus Faber Casadei abbas, uir ornatissimus ac de utroque nostrum optime meritus, mecum aliquando peramanter egit ut ad te scriberem. Quod etsi mea sponte pro*

*con-*

coniunctione beneuolentiâque nostrâ facturâs eram, libenter tamen auctoritate tanti uiri multò etiam magis excitabar. Sed dum diutius quàm par erat, cunctor, ecce literæ abs te mihi redduntur, accuratè sanè & diligenter scriptæ, quibus officium amicitie quod erat mihi reliquum, quo uno tecum poteram certare, si minùs tanta facultate, at pari propemodum uoluntate quasi præripuisti, ac certè perfecisti, ut cùm doctrina & facultate dicendi plurimos præcedas, ne officio quidem aut amore à quoquam te uinci posse intelligeremus. Equidem nondum statim constitui, maiorem ne ex eo perceperim lætitiâ, quòd uideo doctissimum hominem atque eloquentissimum, ultro ad me literas dedisse: an molestiam, quòd non pro eo ac debebam, & uir excellenti uirtute auctoritatèque uolebat, prius id præstiterim, quod tu tanta suauitate & orationis & humanitatis effecisti, ut spem rescribendi penè omnem adimeres, ac nec omninò quidem fuerim ad tuas literas responsurus, mihi ipse diffidens, ni turpe existimasset in amicitia mutuo non respondere, certòque mihi suasset, te spectaturum in hac re amici animum magis, quàm scribentis facultatem. Quòd autem Fabros tuos mihi tam diligenter commendas: profectò tuam in eam familiam uel beneuolentiâ, uel pietatem potius, satis laudare non possum, cui, ut uerè scribis, humanitas & politiones literæ plurimū debent: quæque antea cùm te dilexit. unicè, tum nunc orbatum clarissimo uiro atq; sanctissimo antistite Georgio Selua, certissimo tuorum studiorum patrono, impensius tuendū



LVDOVICI REGII

ornandumque suscepit. Quòd uerò ἐπαύρη tantum mihi tribuis, equidem non sum adeò impudens, ut id, à quo sanè absum longissimè, ullo modo agnoscam: & tamen inficiari non possum laudem, quæ abs te laudato uiro profecta est, magnum interim mihi stimulum ad uirtutem ad mouissè. Aueo scire ecquid agas in hoc summo ocio, ecquid in hac tanta facultate uacui ac liberi temporis commentêris. Te quidem arbitror non cessare. Nec enim decet te eloquentem in primis, & ornatum uberrimis artibus, tibi ipsi tantummodò uiuere aut studere. Quin potius elaborandum in eo suadeo, quod & in primis potes, & à te omnes expectant, ætatem ut nostram scriptis illustres, & celebres tuis. Nam si quis est hodie qui optimè lingua Latina utatur, qui ornate & copiosè, qui aptè & distinctè suas cogitationes literis mandare possit, cum te esse meritò arbitrantur omnes. Quam quidem orationis facultatem aut negligere, aut exarescere sinere, esset hominis cùm in maximis rebus errantis, & parum consideratè eloquentiæ dignitatem intuentis, tum abutentis imprudenter ocio & literis. Epistola fuerunt à te, hæcenus scriptæ ad amicos plurimæ, quæ magnam tui expectationem ubique commouerunt: ostendunt enim te non stylum modò acuisse exercitatione dicendi, sed ipsam etiam eloquentiam & sacrarum literarum ornameto cumulauisse, & cæterarum artium grauiorū instrumento locupletauisse. Accedit ad hæc acerrimum studium, ac perenne, in quo te contineres: iudicium quoque magnæ rerum usu, multæque nostrorum temporum uarietate



rietate confirmatum. Quare quantum conniti animo potes, quantum labore cōtendere: tantum quaeso fac ut efficias, nè ue committas, ut cūm Dei opt. max. concessu atq; munere tam multa tāmque praclara ad scribendum adiumenta sis adeptus, ne aut ingratus negliger, aut immemor tantorum beneficiorum, improbè tibi defuisse uidearis. Hoc à te patria postulat, hoc amici, hoc omnes eruditi, quibus negare & inhumanum maximè esset, & minimè ferendum. Quàm multa iacent ad hanc diem, quæ necdum ullum habuerūt lumen Latinarum literarum, quæ illustrari possunt & excitari? Scripta sunt sanè & nostra memoria, & priscais seculis plurima in omni artium ac disciplinarū genere: sed non omnia tam distinctè & distributè, nec tam elegāter & ornatè, ut commendari eruditorum lectione possint. Si qua uerò talia fuerunt, aut culpa temporum funditus deleta sunt, aut ita mendosa & mutila ad nos peruenerunt, ut multis in locis neutiquam intelligantur. In quibus tamen emendandis, corrigendis, obseruandis, exponendis, uertendis, qui eruditiores hactenus habiti fuerūt, tantummodò occupati sunt. Sed enim demonstratis fontibus, notatis locis ex quibus ueteres illa hauserunt atque duxerunt, quid obstat quominus in hoc spacio doctissimos homines ipsorum uestigijs persecuti, ad eadem quæ tractauerunt, & quarendam, & disputanda perueniamus? Quos assequi ut est difficillimum, sic profectò sequi longè pulcherrimum fuerit: praesertim cūm munus reipublica maius, & mortalium generi melius non possit

# LVDOVICI REGII

*afferri, nec sit ullus animi cultus præstantior, neque alius humanitatis quasi cibus suauior. An cùm Agricola serât arbores alteri seculo profuturas, aliȳ domos ædificent, nemôque sit paulò erectior qui non spectet postera secula ad se pertinere, optimarum artium disciplinæ eruditii homines non cogitabunt futura? non suam prudentiam intelligentiâque ad hominum utilitatē conferent? quòdque aliȳ rebus breui interituris moliuntur, hoc idem diu iucturis literarum monumentis non assequuntur? Atque haud scio, an qui id facere tam eleganter ut tu possunt, tantò etiam magis elaborare debeant, quantò sunt præstabiliora quæ efficiunt, quàm quæ ceteri. NON omnis flos eruditionis siti ueteris ubertatis exaruit: non antiquis solis aditus ad summam doctrinam patuit. Nô est natura, quod plerique falsò queruntur, ita superiorum seculorum fecunditate exhausta, ut nihil amplius pariat & procreet heroicis simile temporibus. Eadem nimirum est semper & ubique sui similis, nec minus potens quàm olim, neque minus ad gignenda & alenda præclara ingenia efficax. Quin ualentior em hodie credi par est, robore adiutam & confirmatam: quòd sensim per tot secula accreuit. Sed paucorum mentes in percipienda sapientia occupantur: auaritiæ arteis tantum colimus, & ea sequimur studia, quorum precium præsens est. Nec uerò si huic ætati docenda elaborauerunt priores, idcirco omnem ueritatem occuparunt. Multum ex illa etiam nobis reliquerunt. Nec ulli nato unquam præcludetur occasio aliquid adhuc adiciendi: semper quod agat,*

agat, inueniet, quisquis serio huc se applicarit. Quanquā igitur artis plurimum prouectas cum à Græcis & Latinis, tum ab Arabibus accepimus: tamen edocti breui tempore, quæ illi ut inuenirent diu elaborauerunt, nobis etiam atque etiam conādum cetera, quæ desunt, inuenire. Nec dubium, quin si huic studio nos penitus totosque dederemus, melius quàm ulli antiquorum de artibus omnibus, de rerum naturis, de hominum moribus, de rebus publicis disputaremus. Et quemadmodum natura generi consulens humano superioribus quibusdam seculis protulit egregios homines nonnullos, quanquam perpaucos, qui mundum omnem acie mētis uiderint, & mortalium atque immortalium naturas indagarint: sic etiam potest similes proferre, qui beneficio cæli ac maiore afflatu ea referant, ad quæ nondum obseruatio penetravit, aut consuetudo, quamuis diuturna, uiam mōstrauit obseruationi. Latet, fateor, in occulto ueritas: sed eius tractatio quotidie potest gignere plurima, quæ cū summa delectatione uestigemus: ἄλλως τ' ἐπεὶ καὶ τοὺς ἐπιστάτας ὁρᾶμεν γινώσκοντας καὶ τῇ πείρῃ καὶ τῇ ἄλλῃ ἀπάντων, & ἀφ' ὧν ἡμεῖς ὠπταί. ὧς καὶ θεῶσι, ἀλλὰ ἀφ' τῶν ἐπαγορευομένων, καὶ ἐλμῶντας αἰεὶ τι κερταῖν τῇ μὴ καλῶς ἔχοντων. Quàm multa nōdum in arte redacta sunt? Quàm multa hoc primū cognouimus seculo? Quàm multa uenientis æui populus ignota nobis sciet? Quàm multa futuris seculis reseruantur? Ista quæ nunc latent, dies extrahet, & ueniet tempus quo posteri tam aperta nos nescisse mirentur. Nimirum magna tardè proueniunt, nec in lucem simul omnia

prodeunt, sed alia ætas aliud addit. καὶ μὴν καὶ τῆν φιλοσόφου ὡς  
 ἡμετέροισι φασι τὰ αὐτὰ ἐν χρόνῳ πολλῷ πελάκις, μᾶλλον δ' ἁ-  
 περάκις ἡρῶας, καὶ ἤτις πταγμύας ποδιδόδους τῷ παντός ἐ-  
 πισήμας καὶ τίχας ἐμφανῆται, καὶ πάλιν ἀφανισθῆναι. Ita sapiens  
 eadem esse reperta, ac sapiens cōcidisse nationibus subla-  
 tis, apud quas illa uiguerant, propter eluviones exustio-  
 nisque terrarum, quas accidere statis temporibus neces-  
 se est, cū ad motū primi cæli, unde motus reliqui inferio-  
 res & omnis natura pēdet, tum ad errantiū syderum cō-  
 iunctiones & separationes, quibus elementa, & quæ ex  
 elementis constituuntur, præcipuè parent. Hanc esse re-  
 rum humanarum continuam uicissitudinem, quæ eodem  
 sapiens recidant, uel quòd materia ad similitudines eden-  
 das est facilis, uel quòd ex quibusdam terminatis nume-  
 ris series rerum connexa existit, quemadmodum Pytha-  
 gora prius, deinde Platoni placuit. Sed quoquomodo se-  
 res habeat, si temporum memoriam replicemus, compe-  
 riemus nullum auctorem ex his quorum scripta extant,  
 exceptis Hebræis, ante tria millia annorum fuisse: quo  
 quidem ex tempore, quantum perspicere possumus, inge-  
 nia literis disciplinisque excoli cæperunt. Cerrè in Gra-  
 cia, quæ eloquētia & omni genere artium floruit, nullus  
 est scriptor uetustior Homero, ὅπε φαίνεται ἑλλήνων οὐδεμίαν  
 ἔχοντας δι' ἀρχαίαν ἀκλὺν παλαιὰν ὁδεῖν, ὅδ' ἐμὰς θύμας χρόνῳ πέλιον  
 ὅδ' ἐν, ὡς οἱ τιμολῶ κ' ἔρεπαι. Quin potius qui interiores  
 scrutantur & reconditas literas, opinantur illas primum  
 apud Aethiopas, Indos & Chaldaeos natas, deinde trās-  
 misisse ad Aegyptios, post ad Græcos & Latinos: quorum  
 inge-

ingenia circa Alexandrum & Augustum maxime eximia in omnibus artibus fuerunt: tandem in Europa senescētes, ad Arabas descēnisse, qui omnē Philosophiā & Mathematica uehemēter excoluerūt: postremò inscitia grassante, tanquam mortuas multis seculis iacuisse, donec nostra & superiore memoria post expugnatum à Turcis Byzantium sese rursus in Italia, Germania, Gallia, Britannia, Hispania erigere cōperunt, tanta iam ad omnem uirtutem atque doctrinam facta progressione, ut hodie non multum aut nihil omninò antiquis Græcis, Romanis, Arabibúsque cedatur. Quòd si quis obiiciat multitudinem librorum qui & scripti sunt, & scribuntur quotidie infiniti: respondebo, paucissimos in omnibus linguis & nationibus, in omni disciplinarum genere inueniri absolute perfectos, planèque eruditos. Quales sunt Platonis, Aristotelis, Hippocratis, Ptolemai: qui non imagines rerum & umbras opinionum consecrati, ἀλλ' ἐρῶς τε καὶ γνώσις φιλοσοφικῆς, καὶ τὰ πράγματα εἰληκεῖν ἔγνωκότες, ἐθεώρησαν πρὸς πάσης ἀληθείας, καὶ ὁσιῶς τ' αἰῶνος, καὶ ὑπὸ χειρὸς καὶ φθερῶς καὶ τῷ ἀνθρώπινῳ ὀφέων ἢ φλυαρίῳ μὴ πλανωμένους. Ἄλλοι δ' εἰσὶν, οἳ ἐπιφυλλίδες, καὶ στυλῆες χελιδίνων, μυνστικά, λαβητοὶ τ' παιδείας, ἢ κατ' ἀεισεφάνῳ ἄνω, qui eadem centies millies dicant commutatis tantū uerbis, & ordine inuerso, ociosos & nugatorios commentarios quotidie inculcantes. At quoniam mutantur quotidie hominum instituta, mores, leges, artes, opiniones, magnum facere iudicandi sunt, uel potius optime mereri de humano genere censendi, qui in tanta rerum incon-

# LVDOVICI REGII

stantia, ac mutabilitate opinionum, instructi differendi ratione, & singulari facultate dicendi, obscuris lucem, dubiis fidem, confusis ordinem, incultis elegantiam, fastiditis gratiam, vetustis nouitatē, nouis auctoritatem dare sua aetate possunt. Itaque tamen si ueteres scriptores multa dixerunt, & nonnulli ex illis mirabiliter probantur: tamen, ut mea fert opinio, quātumuis licet excellāt, quāuis plurimi, uel potius innumerabiles praecefferint, non praeuenerunt nobis, sed praeuenerunt potius nouam semper facultatem scribendi: uidelicet post experientiam tam diuturnam, post tot exempla, quibus nos instruxit antiquitas, post tot aetatum inuenta, post tam longam rerum omnium magnarum atque reconditarum artium scientiam: quae noua illis & inusitata, plus admirationis initio habebant, quā cognitionis. Serendum igitur, si minus hominibus, qui sapenūmerō praesenti uirtuti sunt iniqui, at certē Deo optimo maximo: qui nos, ut cetera omnia, quae ad uictum cultūque pertinent, sic literas etiam & libros, sine quibus hominum uita nulla est, non accipere modō à maioribus uoluit, sed posteris etiā cum nominis nostri, si quid ad rem facit, memoria prodere. ἀλλὰ δὴ λαῶνα εἰς ἀβύσσους, qui haec ad te. Quae si scriberem quasi te erudiens, iurē reprehenderer. Quae tamen quoniam à scribendo alienior paulō nō semel in congressibus nostris uisus es, utcunque attingenda putauī. A me uerō tibi tuisque omnia paratissima existimes uelim: id enim & uirtus tua, & mea consuetudo in doctos homines postulat. Illud ad extremum non rogo solū, uerum-

etiam



